

## UDASËN DADA UAID

---

### **Tauamboen chiaid**

<sup>1</sup>Santiacon utsi Udas nebi.  
Esuquidistun yuambo nebi. Esus  
tantiaquidon mimbi iste dada uanu.  
Mibi tantiaquiquin Nuquin Papan mibi  
Esus tantiamiac. Adoac aid tantiasho  
isash: —Ëbi tantienquoio yanushe  
—quiash Esus mibi cudasec. <sup>2</sup>—Aido  
bëdamboen isquin bëdambo icme, Papa  
—quequin Nuquin Papa chianembi mibi  
tantiaquin.

### **Muaquido iquendac, quequin chiaid**

<sup>3</sup>Ëmbi tantiaido mibi neque. Tantia.  
Nuqui cuidmenquoio icnuec Esus abided  
cuidadec unësaid tantiateuidi mibi  
chuitiadquoio iccobi. Adnuc: —Esus  
tantiaquido iccuededacno muaquido  
puduedosh —quesho tantiaboshon aid  
mibi chuinu. Mibi yacnoshon  
ambenquiobi chuisho: —Mua. Esusën  
chiaidpenquoio mimbi chiec. Aid  
tantiatipimbo iquebi —cata. Nuquin  
Papan tantiacpadomboen Esusën abëd  
icquido chuibanëdaid nuqui tantiaid  
neque. Utsi tantienda. <sup>4</sup>Esus tantiaquido  
mimbi danubi mibi icsamenuec mibi  
yacno muaquido puduedac caosh. Ambi  
ëdenquoio tantiacpadomboen Nuquin  
Papan icsano nidmetequido aido neque.  
Muasho tantienda. —Nuquin Papan  
bëdamboen isaido icsauidequi icsho  
nuqui cuidtiapimbo iquec. Chido  
chishpidambo yec dada cuididimbo yec

quec icsashobi nuqui bëdamboen isec  
—quec comapenec muaique. Muasho  
tantienda. Esuquidistu Nuquin Icbo  
abentsëcshun chiaid niac-niaquec  
icsaique.

<sup>5</sup>Adquid Nuquin Papan comapenen  
cuidendac. Tantia. Nuquin Papan  
cuidampid mimbi tantianëdaid mibi  
chuinu. Equipito yacnoshon  
unësmenuec ancanquidën icsamboen  
chonoa uasho isun ashunquoio Nuquin  
Papan con matses isadaidbo tsusedpabo  
puduamepampic. Adoac yuectanquin  
puduamiaiombi ambi chiaid  
niac-niacsho isun Nuquin Papan  
uesquin unës uapampic. <sup>6</sup>Adembidi  
utsibotsen cuidpampic. Abëd icpampido  
ambi abi yacnoshon uaido mayan chedo  
abëdtan namequido icboedobi Nuquin  
Papan chiaid niac-niacne buncuenash  
Nuquin Papabëd icte bunenquoio  
yampampic. Adec Satanash chedo abëd  
icte bunenquoio icsho isun  
puduentiapimbo yacno icsamboshë  
yacno Nuquin Papan nidmepampic.  
—¿Ada mibi bëdambo icti? Mibi  
icsamboshë iqueque. Mibi cuidnu  
—quetequid ushën padpiden uesquin  
cuidnumbi adopampic. <sup>7</sup>Adembidi  
shubu dadpen yacnocquido cuidpampic.  
Shubu dadpen icquid Sodoma caid  
yacnoshon dadan aton chidopenquoio  
chudnubi adembidi chidon aton  
bënëpenquoio chudmepampic. Dada aton  
dada utsibëdi chichudnanquidquido

icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nêdëncapampic nibêdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anêdënquiacno nêsecaindac —quequin nuqui tantiec.

### Muaquido icsaid

<sup>8</sup>Cuidte tantienquo yec adecbidi muaquido icsamboecuidi tabadec. Aton dada utsibêdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. <sup>9</sup>Mayan bédabo chuiquid dapa Miqued caidën adotiapimbo icpampic. Aidi Moises unêsacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquo icpampic Miquedën. Adenquo icquin: —Nuquin Papambien mibi cuidec —capampic Miqued caidën mayan bédabo namequid dapa icquin. <sup>10</sup>Muaquidombien ambi tantienquo yaid icsamboen chuishunec. ¿Ada bêdi cuidnushe quepadic? Adembidi abi cuidte tantienquo icquin ambi tantiaiduidi naic tabadsho Nuquin Papan cuidendac.

<sup>11</sup>Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niactiadquo yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic.

Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac.

<sup>12</sup>Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibêdtambi muaquidon piac caosh. —Esus tantiaquidquo nebi —quiash puduedash dacuêdenquo yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquo. Ambi naiduidi naquin ambembi chiaid chiac matses nadquo iquec. Uispa dadpen icboedi badiadnuc abu chëshën bêtinacsho isash: —Tanunquien badiadec —queuidacbimboec matses iquec. Pete ambi nitsinaid unêsacsho istuidash: —Pete nitsinuidombi —quiacbimboec muaquidon chuisho tantiaquido: —Bêdamboen chiaid tantianu —queuidendac. <sup>13</sup>Acte têccuasquequidën cuêmano nushan uaquin icsa uacbimboen icsaquin muaquidon mibitsen icsamec. Abi capuaid tantienquo yequi: —Ëbi capuaid tantiaquidquo nebique. Isec cho —queboedi bënudtaniacbimboen: —Nuquin Papan chiaid tantiamequidquo nebi —queboedëmbi tantiamenquo iquec. Adec muasho cuidquin Nuquin Papan puduentiapimbo yacno icsamboshë yacno nidmendac.

<sup>14</sup>Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshë Nuquin Icbobêd choendac. <sup>15</sup>‘¿Ada mibi bêdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho

choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus mattses cuidnuec chote chiec. <sup>16</sup>Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquiëc. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash mattses chiec: —Ëmbi tantiaidquio mibi nec —quec muaic.

#### **Esus tantiaquionona, quiaid**

<sup>17</sup>Ëmbi tantiaido mibi neque. Tantia. Esusbëd iccondaïdon chiaid mibi chuinu. <sup>18</sup>Nadpondash. “Esus padpidec choabi icnuc Nuquin Papan chiacpadec bëdamboec tabadsho Esus tantiesabon mamënshunendac. Nuquin Papan chiaid niac-niaquec abi bunacpadec icsaquiendac,” quepondash. <sup>19</sup>Adquio muaquido iquec. Aton padi yec icsaiqui chieshëmënquin mibi cuësh-cuëshëdmec. Nuquin Papan aton Mayan aidobëd tabadmenquio iquec.

<sup>20</sup>Adquid icsacpadec icsainquio icquin Esus tantiatsëcboedëmbi Nuquin Papan chiaid isban-isbanquin ënenquio icquin Esusbëdta Nuquin Papa tantianuna. Nuquin Papan Mayanën tantiamiacpadomboen Nuquin Papa chianenuna. <sup>21</sup>—Abi tantiasho bëdamboen isquin abi yacno Esusën nuqui tabadmendac —queshun Esus

chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. <sup>22</sup>Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiashe: —¿Abimbobida capeba? —quesho tantiashun nëishenquio icquin Nuquin Papan chiaidquio tantiamenuna. <sup>23</sup>Bacuëmpi cuëten pichiquetsensho: —Baded bed. Taidnushë —quiacbimboen —Icsano nidmequin Nuquin Papan cuidnushë —queshun utsibo Esus tantiamenuna. Icsaquadotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda. <sup>24</sup>Nuquin Papa bëdamboshë iquec. Aid tantiashe nuqui icsamenquio iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. <sup>25</sup>Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icho Esusded cuidshun abi tantiaquido cuidenquio icquid nec. Abitedishun Icbombo Nuquin Papa nec. Nadatiambo icquin nabanquidquio nec. Abitedi chuiquid dapambo yec abitedi namequidquio nec. Bëdamboshë iquec —canuna ënenquio icquin. Esus tantiaquido icquin adonona. Padi. Aidtedi chuiquin dada uaombi.